

Bosna i Hercegovina  
**BRČKO DISTRIKT**  
**BOSNE I HERCEGOVINE**

Komisija-Povjerenstvo za odlučivanje  
o sukobu interesa



Босна и Херцеговина  
**БРЧКО ДИСТРИКТ**  
**БОСНЕ И ХЕРЦЕГОВИНЕ**  
Комисија за одлучивање о  
сукобу интереса

Trg mladih 8, Zona 1A, drugi sprat-kat / 76100 Brčko distrikt BiH, tel: 049/490-135, web: www.sukobinteresabd.ba, e-mail: info@sukobinteresabd.ba  
Трг младих 8, Зона 1А, други спрат / 76100 Брчко дистрикт БиХ, тел: 049/490-135, веб: www.sukobinteresabd.ba, е-пошта: info@sukobinteresabd.ba

Broj: KSI-09-06/25

Datum: 28.01.2025. godine

Na osnovu člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21) i člana 25. stav (2) Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“ broj: 19/21), postupajući po anonimnoj prijavi od 13.01.2025. godine protiv S. B. i M. S., kao nosilaca javne funkcije, Komisija za odlučivanje o sukobu interesa, na 112. sjednici održanoj dana 28.01.2025. godine, donosi

#### ODLUKU

Postupak za odlučivanje o sukobu interesa protiv nosioca javne funkcije, S. B., [REDACTED] u Skupštini Brčko distrikta BiH i M. S., šefa [REDACTED], koja je obavljala javnu funkciju [REDACTED] u Skupštini Brčko distrikta BiH, neće se pokrenuti, s obzirom da iz prikupljenih podataka i dokumentacije ne proizlazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

#### Образложење

Dana 13.01.2025. godine Komisija za odlučivanje o sukobu interesa putem e-maila zaprimila je anonimnu prijavu, radi sumnje na povredu odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanje sukoba interesa, protiv S. B., [REDACTED] u Skupštini Brčko distrikta BiH i M. S., šefa [REDACTED], koja je obavljala javnu funkciju [REDACTED] u Skupštini Brčko distrikta BiH do 18.01.2025. godine.

U prijavi je navedeno da su S. B. i M. S, kao nosioci javne funkcije, [REDACTED] u Skupštini Brčko distrikta BiH, u vrijeme obavljanja mandata poslanika, imali zaključen ugovor sa jednim od preduzeća skupine [REDACTED], što je protivno odredbama Zakona o sprečavanju sukoba interesa u institucijama Brčko distrikta Bosne i Hercegovine.

Članom 2. tačka c) Zakona o sprečavanju sukoba interesa u institucijama Brčko distrikta Bosne i Hercegovine propisano je da je „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Uvidom u Registar javnih funkcija i nosilaca javne funkcije, koje vodi Komisija, utvrđeno je da S. B. obavlja funkciju [REDACTED] u Skupštini Brčko distrikta BiH, na osnovu uvjerenja Centralne izborne komisije, broj: [REDACTED] od 05.11.2024. godine, kao i u prethodnom mandatu, a na osnovu uvjerenja Centralne izborne komisije, broj: [REDACTED] od 15.12.2020. godine, dok M. S., od 18.01.2025. godine, obavlja funkciju šefa [REDACTED], na osnovu odluke o imenovanju šefa [REDACTED], broj: [REDACTED] od 13.12.2024. godine, ali je do 18.01.2025. godine obavljala javnu funkciju [REDACTED] u Skupštini Brčko distrikta BiH na osnovu uvjerenja Centralne izborne komisije, broj: [REDACTED] od 05.11.2024. godine, te su obavezni postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

Postupajući po navedenoj prijavi, Komisija je uputila zahtjeve za dostavu podataka Stručnoj službi Skupštine Brčko distrikta BiH, a koji se odnosi na pitanje da li je u toku 2023. i 2024. godine pravno lice „[REDACTED]“ bilo predmet raspravljanja, razmatranja i odlučivanja po bilo kojem pravnom osnovu na sjednicama Skupštine Brčko distrikta BiH, te koje prirode su bile odluke, ukoliko su bile donesene, a koje su se eventualno odnosile na gore navedeno preduzeće. Takođe, zahtijevana je informacija koji poslanici, poimenično, su učestvovali na sjednicama Skupštine Brčko distrikta BiH, u procesima odlučivanja ili glasanja u tačkama vezanim za navedena pravna lica. Zahtijevan je podatak na pitanje koja lica su se izuzimala od glasanja, po svim tačkama koje su se odnosile na navedena pravna lica.

Stručna služba Skupštine Brčko distrikta BiH, aktom broj [REDACTED] od 21.01.2025. godine obavijestila je Komisiju da je tokom 2023. i 2024. godine Skupština Brčko distrikta BiH razmatrala i usvojila odluku o raspolaganju javnom imovinom putem specijalne pogodbe samo sa preduzećem „[REDACTED]“ d.o.o. Brčko. Odluka je bila predmet rasprave i usvajanja na 55. redovnoj sjednici Skupštine Brčko distrikta BiH, održanoj dana 21.02.2024. godine.

Uvidom u dostavljene podatke od strane Skupštine Brčko distrikta BiH, uočeno je da su poslanici S. B. i M. S. učestvovali u glasanju po tački razmatranje i usvajanje prijedloga odluke o raspolaganju javnom imovinom putem specijalne pogodbe sa preduzećem „[REDACTED]“ d.o.o. Brčko, a koja je razmatrana i usvojena na 55. redovnoj sjednici Skupštine Brčko distrikta BiH, što u ovom slučaju nije moglo imati bitan uticaj, s obzirom da je predmetna tačka dnevnog reda bilo pravno lice „[REDACTED]“ d.o.o. Brčko, a ne pravno lice „[REDACTED]“ d.o.o. Brčko distrikt BiH.

Članom 7 stav (1) Zakona o sprečavanju sukoba interesa u institucijama Brčko distrikta BiH propisano je da nosilac javne funkcije, za vrijeme obavljanja javne funkcije, ne može biti član skupštine, nadzornog odbora, organa upravljanja i rukovođenja, biti u svojstvu lica ovlaštenog za zastupanje, niti imati bilo kakav finansijski interes u obliku plate ili naknade, uključujući i pružanje ličnih usluga, u bilo kojem privatnom preduzeću: a) kojem su vlasti u BiH davale podsticaje, olakšice, donacije i grantove, uključujući i kreditna sredstva, u iznosu većem od 10.000,00 KM na godišnjem nivou, u periodu od četiri godine prije stupanja na dužnost nosioca javne funkcije.

Imajući u vidu sadržinu odredbe člana 7. stav (1) Zakona, za vrijeme trajanja mandata [REDACTED] u Skupštini Brčko distrikta BiH, ne bi postojao sukob interesa u slučaju u kom bi nosilac javne funkcije istovremeno bio zaposlen u privatnoj firmi kojoj su vlasti u BiH davale podsticaje i olakšice u iznosu većem od 10.000,00 KM na godišnjem nivou prije stupanja na dužnost i u situaciji ukoliko privatno preduzeće još uvijek ostvaruje podsticaje od vlasti u BiH na godišnjem nivou u iznosu većem od 10.000,00 KM, jer bi nosilac javne funkcije bio

zaposlenik-radnik, a ne osoba koja bi postupala u svojstvu člana skupštine, člana nadzornog odbora i organa upravljanja i rukovođenja ili u svojstvu lica ovlaštenog za zastupanje.

Član 11. stav (1) Zakona o sprečavanju sukoba interesa u institucijama Brčko distrikta BiH propisuje da nosilac javne funkcije ne može učestvovati u procesu odlučivanja niti glasati po bilo kojem pitanju koje nosioca javne funkcije stavlja u sukob interesa što uključuje pitanja koja se direktno i indirektno tiču privatnog preduzeća u kojem taj nosilac javne funkcije ili s njim povezano lice ima finansijski i drugi interes, te bilo kojem drugom pitanju koje se direktno ili indirektno tiče povezanog lica; stav (2) istog člana propisuje da je nosilac javne funkcije dužan prijaviti finansijski i drugi interes iz stava (1) ovog člana te neće preduzimati nikakve službene radnje koje su od uticaja na poslovanje privatnog preduzeća u kojem nosilac javne funkcije ili s njim povezano lice ima finansijski interes, kao ni radnje kojima nosilac funkcije ili s njim povezano lice ostvaruje finansijski interes, uključujući i radnje vezane za zapošljavanje, imenovanje ili postavljenje sa njim povezanog lica u organu odnosno instituciji u kojoj obavlja javnu funkciju, a stav (3) istog člana propisuje da će se u slučaju iz stavova (1) i (2) nosilac javne funkcije izuzeti od svih službenih radnji, učešća u raspravi, glasanja i odlučivanja i obrazložiti razloge izuzeća.

Naime, uvidom u dostavljene podatke od strane nosioca javne funkcije i dokumentaciju koju posjeduje Komisija za odlučivanje o sukobu interesa, S. B. zaključio je dana 15.05.2024. godine ugovor o djelu sa „[REDACTED]“ d.o.o. Brčko distrikt BiH, [REDACTED], čija pretežna djelatnost je shodno podacima iz registra privrednih subjekata Osnovnog suda Brčko distrikta BiH, savjetovanje u vezi s poslovanjem i ostalim upravljanjem, a konkretan posao iz navedenog ugovora bila je analiza aktuelnih privrednih kretanja i statističkih pokazatelja u BiH u tromjesečju 2024. godine. Takođe, dana 16.08.2024. godine, zaključen je drugi ugovor o djelu istog sadržaja. Navedeni ugovori su bili zaključeni na vremenski period od po 3 (tri) mjeseca, što je vidljivo iz priloženih ugovora od strane nosioca javne funkcije, kao dokaz pri podnošenju Izvještaja o imovinskom stanju tokom 2024. godine.

Takođe, uvidom u dostavljene podatke od strane nosioca javne funkcije i dokumentaciju koju posjeduje Komisija za odlučivanje o sukobu interesa, vidljivo je da je M. S. dana 12.11.2024. godine zaključila ugovor o djelu sa „[REDACTED]“ d.o.o. Brčko distrikt BiH, [REDACTED]. Naime, konkretan posao iz navedenog ugovora je savjetovanje u vezi sa Zelenom agendom, predviđanja posljedica za privredno poslovanje u slučaju neusklađivanja BiH sa međunarodnim obavezama, te savjetovanje u pogledu investiranja u obnovljive izvore energije. Navedeno je vidljivo iz priloženih ugovora od strane nosioca javne funkcije, pri podnošenju Izvještaja o imovinskom stanju.

Imajući u vidu sve naprijed navedeno, Komisija je cijenila da u konkretnom slučaju S. B. i M. S., [REDACTED] u Skupštini Brčko distrikta BiH, kao nosioci javne funkcije tokom 2024. godine nisu postupili protivno odredbama člana 7. stav (1) Zakona o sprečavanju sukoba interesa u institucijama Brčko distrikta BiH, niti člana 11. stav (1) Zakona o sprečavanju sukoba interesa u institucijama Brčko distrikta BiH za vrijeme obavljanja javne funkcije [REDACTED] u Skupštini Brčko distrikta BiH, jer „[REDACTED]“ d.o.o. Brčko distrikt BiH nije bio predmet rasprave na sjednici Skupštine Brčko distrikt BiH, nego je predmet rasprave i odlučivanja bilo isključivo preduzeće „[REDACTED]“ d.o.o. Brčko, a vezano za raspolaganje javnom imovinom putem specijalne pogodbe, kako to stoji u aktu Skupštine Brčko distrikt BiH. Shodno navedenom nije omogućena pravnom licu „[REDACTED]“ d.o.o. Brčko distrikt BiH bilo kakva imovinska korist od strane Brčko distrikta BiH, a nosioci javne funkcije su upravo sa ovim pravnim licem zaključili ugovor.

U zahtijevanim i dostavljenim podacima od strane nosioca javne funkcije, vidljivo je da su S. B. i M. S. tokom januara 2025. godine, raskinuli zaključene ugovore sa predmetnim pravnim licem.

Slijedom navedenog, a na osnovu prikupljenih akata, dokumentacije i uvida u iste, utvrđeno je da S. B. i M. S. kao nosioci javne funkcije, nisu povrijedili odredbe Zakona o sprečavanju sukoba interesa u institucijama Brčko distrikta Bosne i Hercegovine, odnosno ne postoji sukob interesa, jer nisu ustanovljene okolnosti koje bi ukazivale na moguću povredu odredaba Zakona od strane nosioca javne funkcije.

Na osnovu navedenog, Komisija je donijela odluku kao u dispozitivu.

**Pouka o pravnom lijeku:**

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 dana od dana prijema ove Odluke.

Predsjednik  
Komisije za odlučivanje o sukobu interesa

---

Admira Mujić, dipl. pravnik

Dostaviti:

- Anonimnom podnosiocu putem oglasne ploče,
- Internet stranici,
- Evidenciji,
- Arhivi.